

مرند اۆيکو

Mərənd öykü



اۆزوموز واريق دااا...

يازار: نيگار خياوى

Web adress:www.marand-oyku.arzublog.com

Face book:www.facebook.com/marandoyku

Email:rezaaydin491@yahoo.com

اۋزوموز وارېق دااا...

نيگار خياوى

اۋون چىخاندا سحرچاغى گۈزلەدىن "سىيلجان" كليپىنى قورتاردى، سورا چىخدىن. شالوارىوى اوتاقتا گىيىپ دويمەلرېوى تلسە تلسە گىتيرىپ "سىيلجان"ىن قاباغىندا دويمەلدىن. داراغىوى دا جىيوندە گىتيرىپ چاللانمىش ساچلارېوى اونون قاباغىندا دارادىن. او بېرى جىيوندن آتکولون چىخاردىپ تزه قىرخدىغىن اوزووه، بويون بوغازىوا سېدىن. سورا اليوى چکدون بويون بوغازووا. اليوى شالوارىوين زېپىنەجن ائندىردون. كۈينەيىوين دويمەلرېنى گۈبەيىوہجن آچىپ تزه دن دويمەلدون "سىيلجان"ىن قاباغىندا. اليوى شالوار جىيىوہ ساليب دھليز قاپىسىنا سارى گندندە دۋنوب منە باخدون. قاپىنى باغليىپ چىخدون. تزه ن قاپىنى آچىپ سەسيوہ قايغىلى ھاوا وئرىپ دئدون:

- ماماگىلە زادا گندىسەن آپارىم؟

- خۇوصلم يوخدو، دئديم.

مامامگىلى تئز تئز يادىما ساليسان بو گونلر.

*

ناھاردان سورا چكىپ كئشنن دالدا باغلادىم ساچلارېمى. الە گلمىردى شووقرىپ. الوندەكى نايلون قابچاغدان بيغلارېوا رەى ياخا ياخا، - چوخداندى دای آرايشگاھا زادا گنتمىسن آى آرواد، دئدون.

- خۇوصلم يوخدو، دئديم.

اىستىكانىوى نلېكىيە قوياندا چىنى بىر سس داغىلدى اوتاغا.

ايكىمينجى چايى ايچە ايچە، - قىزىل گول ايچىرىك، چاي ايچمىرىك كى، دئدون. يئكە درىن قورتوملارنان چايىوي هورتىلداتدون. سورا نلېكىنين چىنى سسىنن آرامىزا گىيردىن. گىيرمەن قورتارچاغىن اونون ھاواسىنان، - زەھرىماااا...!، دئديم اورەيىمدە. سورا ساچىمدان بىر دستەسىنى بارماغىمنان سىغاللىيا سىغاللىيا ياناغىمين اوستە قىويردىم.

دوروب گئتدون تووالئتە. گندىپ ايكى بالىش گىتيرىپ يان يانا آتديم آرايا. اوزو قويلو اوزاندىم. بىر قىچىمى قارنىما يىغدىم، سن تووالئتدن چىخاناجان او بىرىسىنى دە اوزاتدىم. اوزومو چئويردىم سئون بالىشوا سارى. اتيىمى چكديم يوخارىلىق، بودلارېمى تۈكدوم ائشپىيە. گلدون. اوزاندون. باشىوى بالىشا قويا قويا، - آى ددە واى ائى ىى...، دئيب آغىز بورنووو چكىپ بوزوشدوردون. يانى چوخ يورغونام، كنفسىزم، دىندىرمەلى دئيلم و بئلە بئلە سۈزلر. آرخاسى اوستە اوزانىپ

تاوانا باخدون. دیزیمی بیرآز دا بیغدیم قارنیم و میزیلداناراق، دیلیمین آلتینا بیر ماهنی آلدیم: - نینا نای نای نای نینای... . هله تاوانا باخیردون.

بارماخلاریمی سالیب ساچیمی دارادیم. سورا قولومو قووزاییب هاوادا آیدیم سنون اوستووه. بارماخلاریمین آرالارینا ایلیشن بیر نچه تئلیمی گۆزوون قاباغیندا اوینادیب اوینادیب تئل لریمی اوچورتدوم اوزووه.

- ایشیق چالیر پنجره دن گۆزومو قاماشدیریر، دئییب، دالیوی چئویریب بؤیرو اوسته دۇندون.

*

کئچن هفته شاققاناق چکیب - دئیر اوغلوم منه آتا دئینده، دئیرم آده کوپولو! آتان دَیلم ائی، من دایی وام دایی!، دئون. سورا تومانیوی قارنیوین بوغازینا کیمین چکیب - ائوونن مهندس نوری، بئله شیرین آدامدی اِ ائی بئله ...، دئییب گئنه شاققاناق چکدون. من دیش ساپینی بارماخلاریم توولایا توولایا دئدیم: - واللا... اوندآ آروادی دا دئسین، بالا من سنون بییوم ... - دای بیلین... زاد اولور دا... نئینه سین. دئیر، الیم آروادیمین بودونا دَینده، ائله بیل اۆز بودوما الیم دَیر.

آخماق آخماق دئدیم: - به نییه؟ و سسیمی رزین کیمی چکیب الیوین یان یۆره سینه جن اوزاتدیم، - او کی آدامین گۆزونه گیریر.

- نه بیلیم واللا... اونون دا آروادی سیر صیفتدن دوشوب.

- اوغلونون تویوندا ائله گۆزل لزگی اوینوردو کی.

tv Az کانالیندان تورکیه کانالینا چئویریب قیچیوی قیچیوین اوسته آشیردون.

- آغاجفراغانین اییرمی بئش یاشینداکی رشتده کی تزه آروادی نئینیر؟، سوروشدوم.

- مهندس نوری دئیردی دای بو یانلارا گلیمیر. گئدیپ شیرکتینه بی شعبه ووروب اورالاردا قالیر ائله.

- بس آروادی بوردا...

کسدون سۆزومو، - آه بابا نئینیریک آخی. خاخان نه ایشیمیز...

*

پالتاریوی دَیشیب اوتاقدان چیخمان اوزون چکدی گئجه ائوه گلدییینده. موبایلووینان اوینایا اوینایا گلیب اوتوردون. تیلویزیونو آچدون؛ دالیجا ماهواره نی ده آچیب میز اوستونده کی کیتابی گۆتوروب اونو دا قویدون قاباغیوا. Şu Çılgın Türkler. نچه آیدی بو کیتاب الونده. تیلویزیون "تاتلی سس" کانالی اوستونده یدی، سسی ده قیسیق. - نه خبرلر؟، دئدیم. گۆزوو کیتابدان آلمادان - هئش...، دئون. بئش اون دَیقه بئله سینه کئشدی. بیلیردون گۆزومون آلتینا آلمیشام سنی. اونا گۆره کیپرک لریوی داها یاتیردیردون کیتابا. حتتا یوخلامیش کیمی ده گلیردون گۆزومه هردن.

- یوخلیبسان؟ وور اخبارا!

دیکسینتیوی تئز گیزلادیب تیلویزونا باخا باخا، - آه...، دئییب دیزون اوسته بوراخیلیمیش کنترولو تیلویزونا ساری توشلادین.

- کئشدی اخبار، دئدیم.

- یوخ بابا هله.

- به سیتاره خانیم درخشیشه باخميسان؟

اوزون تیلویزونا ساری باشیوی توولادون منه و تیھی کیمی بیر گولوشه بنزر سس ده دیش- لریون آراسیندان ائشییه تۆکولدو. - سیتارا خانیم اولماسین، لونا خانیم شاد اولسون. شادیللی شاد اولسون...، دئدیم من ده و سنین بایاخرکی چیخارتدیغین تیھی کیمی سسدن چیخارتدیم. بیلردون یاواش یاواش باشلامیشام تله می قورماغا. پیس یئرده کاریخدیرمیشدیم. هارا قاچا بیلردون؟ جانیوی نجه قورتارا بیلردون؟ بیرجه قورتاراجاغین هوپ توتماندایدی. اونو دا کی توتموشدون. بیلردون من ده احتیاطلی جنه وارام، یئمیمی یاخچی تانیرام. سوسوب دینمه دون و بئله سینه دئییتدشمه یه باشلاماغمیزین وربانین یئرینده بوغدون.

- اوشاخلاردان نه خبر، دانیشیبسان بویون دون؟

اؤز آرامیزدی اوشاخلار لاپ یئرینده دوشدو یادیوا. ساغ اول، ائله منیم ده دادیما چاتدون واختیندا. هئچ منیم اؤزومون ده او ساها ت دئییتدشمه یه حؤوصلم یوخییدی. اولسنیدی باشلاتماسینی یاخشیجا باجایردیم. تکی هردن بیر، آرادا سنه پورسوق گلیب آیلنمک ایستیردیم. ایچونده کی دیکسینتی لریوی دیکسیندیرمک، عصب لریمی دینجلدیردی.

- هه... یاخجیدیلار. ترم امتیحانلاری باشدانیب. باشلاری قالدی. تهرانین دا هاواسی قیزیشیر یاواش یاواش.

بو اوزون جاوا بیم یئرلی آرا آشدی بایاخرکی آتدان آتدان سویوق ساواشیمیزا. باشیوی کیتابدان قووزویوب منه باخراق، - او قدر باشیما ایش تۆکولوب کی شیرکته... خارابادا باش قاشیماغا ماجالیم اولمور، دئدون. سورا کنترولو آلیب ماهواره کانالیندا "بی. بی. سی" رادیوسونا چئویردون.